

Studentenan di prome aña, ta duna presentacion musical na IPA

ORANJESTAD – Arte ta un parti importante pa desaroyo. Diabierna dia 19 di juni 2015 e studentenan di prome aña di Instituto Pedagogico Arubano (IPA) a presenta un tremendo presentacion artistico y musical na IPA.

E produccion artistico ta un forma cu IPA ta evalua e habilidad nan cu e estudiante mester desaroya durante e modulonan di Educacion di Baile y Educacion di Teatro como parti di e curiculo di Arte di IPA. Meta principal di IPA cu e musical nan ta pa ofrece e futuro maestro conocimiento pa e por duna bon educacion di arte. Na mes momento nan por ofrece e muchanan un experiencia educativo pa medio di arte tambe.

IPARTE

Segun e instituto, ta cus-



tumber cu IPA ta gradici tur scol preparatorio y basico cu a brinda e studentenan e oportunidad pa haci nan practica cu ta un parti obligatorio di e programa di IPA. E gradicimento aki ta resulta e aña aki bou di e nomber IPARTE cu ta un presentacion artistico di baile, teatro, musica y arte visual. E studentenan mes a crea e presentacionnan aki bao di guia di e

docentenan Mayra Stroecken (baile) y Amy Lasten (teatro). E studentenan a desaroya entre otro e storia skirbi, nan a haci e coreografia di baile, nan a crea e vestuario y e decoracion di escenario materialnan recicla, nan a scoge e musica y nan a skirbi nan propio cantica. E produccion di klas 1A ta hiba e titulo Celebracion na Rio inspira pa e pelicula Rio 2 di Blue



Sky Studios.

E mensahe cu e studentenan kier trece cu e produccion aki ta cu nos mester cuida nos medio ambiente, pa no bringa otro y biba hunto manera un solo famia. E produccion di klas 1B ta carga e nomber Nos tur ta criatura bunita. Dora la Exploradora ta e protagonista principal den e storia den cua e ta soña cu destruccion di medio ambiente. E mensahe di e grupo aki tambe ta reservacion y cuido di nos medio ambiente. E biaha aki 11 scol primario cu un total di 487 mucha a experiencia e dos programan musical.

Educacion na scol

Mundialmente educacion di arte ta inclui varios disciplina cual ta baile, teatro, arte visual y diseño, musica, cine y media arts, moda y literatura. Na Aruba te ainda ta duna solamente dos disciplina na scol basico, esta arte visual y musica. IPA ta forma maestro pa medio di cuater disciplina cual ta baile, teatro, arte visual y musica. Estudio científico rond di mundo a comproba cu educacion di arte ta crucial den educacion di mucha y hoben door cu e ta contribui na propio desaroyo di conocimiento y di mundo, habilidad creativo y imaginacion, pensamiento critico y facilidad pa resolve problema, disciplina, habilidad social y na formacion di liderazgo. Den e proceso di crea e musicalnan pa IPARTE, e studentenan di IPA ta desaroya tur e habilidadnan menciona. Pues, pa medio di Educacion di Baile y Teatro habilidad creativo, cognitivo, motorico, social emocional y reflectivo ta keda desaroya y evalua.

E docentenan ta recomenda tur maestro di scol pa duna nan muchanan oportunidad pa siña pa medio di Educacion di Arte y p'asina e muchanan por expresa nan mes pa medio di varios dis-

ciplina di arte manera baile y teatro.

Arte na Aruba

Aruba ta haya falta di arte, den pasado Bon Dia a trece esaki dilanti caba.

Caminda diferente hende a duna nan comentario tocante esaki. Caminda ciudadano Zeenah Muyale a subraya. "Mi ta haya cu arte ta algo cu no ta wordo tuma hopi na serio na Aruba, cu excepcion di e artistanan. Hopi hende ta kere cu e ta coy kens y cu artistanan mester gewoon haci loke nan ta haci gratis?? Na scol mes, pa duna un ehempel, arte ta wordo considera como un extra vak gewoon y tin scol hasta cu no ta haya tur disciplina di arte siendo cu arte ta algo hopi importante pa bo desaroyo. Mi mama mes a studia CKV baile y el a pasa hopi duro pa haya trabou na scol paso nan no ta wak e vak ey como algo di necesidad of algo importante. Tin hopi hende cu lo kier cuminsa haci algo den direccion di arte pero hopi no sa unda pa bay of unda pa cuminsa. Anto aki na Aruba tin asina hopi hende cu talento y tur ta move paso akinan bo no por haci esey como bo carera, of tin chens cu bo por pero e chens ey ta masha tiki mes. Mi ta haya cu mester tin mas evento grandi pa artistanan local unda cu nan por demostra nan talento sea ta baile, canto, pintura, teatro, poesia. Na luga di tin concierto di hende di afo, e placa por wordo inverti den nos mesun talentonan local!"

